



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 3

Centre-i totzü nungi aazükba sen state nem lemtsütsüla: Mamata

Zoramthanga-i Centre dang Mizo oshi jembir chief secretary shimtsü mepir



VOL. XIX ONO. 33 (ADOK 33) DIMAPUR RASEMNÜ (WEDNESDAY) YIMPOKSÜI (NOVEMBER) 10, 2021

₹ 5.00

NSCN(IM) mesüra NNPGs den tenanzüktep agiba ajanga Nagaland ajanzüktsü

ULB ELECTIONS MAGIBA AJANGA CENTRE NUNGI SEN TEYARI MANGUR

Kohima, November 9, 2021 (TYO): India sorkari NSCN(IM) mesüra Working Committee den tatembang tenanzüktep ka nung sign asüba ajanga Nagaland ya state balaka akümtsü aser maongka talila angutsü ta Chief Minister Neiphiu Rio-i ashi.

"India sorkar den parnok olemtepdar, anungji ni kechi ataloktsü'ar meshitet" ta Rio-i ashi.

Framework Agreement mesüra Agreed Position nung sign asüba ajanga Indian Union nung inyakyim ka tenzükba lir aser iba ya Naga nung maitsü, putiotsü, sobaliba aser inyaksangshi kümzüka ayutsü atema lir, ta pai ashi.

Iba ajanga 16 Point Agreement ajanga adokba Arila 371(A) nungi tenzükter Naga nung maongka agirtem ama alitsü telemtetba agitsü, ta Rio-i metetdaksü.

"Telok ka den danga tenanzüktep agira, asenok nem maongka tasen aika agütsütsü aser state balaka akümtsü" ta paisa ashi.

Nagaland sorkari tawa tongti teloktem den senden amendang Chief Secretary lenisüba nung Principal Secretary Home (member secretary) aser Eastern Nagaland People's Organisation (ENPO), Central Nagaland Tribes Council o Tenyimi Public Organisation nungi nübo anana den tetsür ana adenba luden ka tentetogo, ta Rio-i Urban Local Bodies (ULBs) indang olen jembidang ashi.

"14th Finance Commission nungi Nagaland nem Rs 135 crore tashi ULB grants asenok mangu. Sorkari administrative officers nem ULBs ketdangsä moudaksütsü saka municipals aser town councils ketdangsätsü atema teshimtet telok ka alitsüla" ta paisa metetdaksü.

Sorkari shimtetba Luden ajanga osang magütsü tashi 15th Finance Committee-i

lemzüktsüba sen makoksatsü atema sorkari ULBs nung nisungtem shima inyakdaksütsü, ta CM Rio-isa ashi.

Iba ya khen atema dang lir aser luden ajanga osang agütsüba sülen elections agia nübotem shimtsü, ta paisa shisem.

"Constitution nung 73rd Amendment ta ya Panchayati Raj aser rural local bodies den sendaktepa lir, saka Naga nung pei sobaliba aser inyaksangshi aliba ajanga iba nung Nagaland madener. Ajisüaka, 74th Amendment ya urban areas aser women reservation den sendaktepa lir saka asen nübortem ketdangsubaren nung asen sobaliba benoktsü akok" ta bilemer, ta CM Rio-i metetdaksü.

"Municipal aser Town Council Act ajanga Centre-i ULBs nem senotsü magütsür. ULBs nem sen magütsüba atema nübortem dak tai tongloktür saka ano kasa mapang nübortem Municipal Act sülen manidaknür. Naga loktiliba ya menenogo aser asenoki mapa inyaksü aser achiajem asütsü angazüktsüla" ta paisa ashi.

"Urban areas ya ajak temeyoktep aliba tesem ka lir aser nisung ajak meyong lir. Anungji tangar ka dak asen sobaliba inyakyim benshitsu makok aser elections agitsüla. Iba jagi tang atema nominations mapa inyaksüsa akümer" ta Rio-isa shisem.

ULBs ajanga tax sarutetbaji state sorkar nem magütsütsü saka pei jila nung gari lenmang, sanitation aser tanga mapa inyaksü atema ayutsü, ta paisa ashi.

Sorkari ULB züngsemtem shimtsü ta asüba nung telok kari magizükter aser iba atema CM Rio-i "asenok democracy ka nung alir aser nisung ajaki ola adoktsü akok, saka sorkari ULBs züngsemtem meshimtsüla ta asüba kuli tejanga agütsütsüla" ta metetdaksü.

CM Neiphiu Rio-i "The People's Bridge" lapoktsüogo



November 9, 2021 nü Hotel Vivor Kohima nungi online ajanga The People's Bridge lapokba sentong nung Chief Minister Neiphiu Rio den ECS aser Hans Foundation ketdangsurtem agiba noksa angur.

Kohima, November 9, 2021 (TYO): Chief Minister Neiphiu Rio-i Mongulbarnü online ajanga "The People's Bridge" lapoktsüogo.

Iba apu ya Tuensang district nung Yijung ayong temdanga yangluba lir.

Iba apu ya Eleutheros Christian Society (ECS), nübortem, The Hans Foundation, PWD, RD, PHED amala sorkar department tem, Assam Rifles, Border Roads Organization aser tangartem yaritepa yanglu.

ECS den HANs Foundation aser Hakchang nung alirtemi tongti süa iba mapa inyak.

Mongulbarnü Hotel Vivor nungi online ajanga Chief Minister Rio-i apu lapoktsü.

Apu aser gari lenmang kilometer 10 ya Rs. 1.20 crore shi endoka yangluogo.

"Loktiliba ka renoktsü atema shisaliok, health care, connectivity aser lenmang nungdaker. Iba apu aser lenmang yangluba nung shilem agir ajak nem tenüngsang agütsü. Lokti kati kibur tebilemtsü maben tashi terenlok balaka malitsü" ta CM Rio-i apu lapoktsüdang ashi.

Lokti indang tashi angateta Nagaland sorkari healthcare system, education aser power nung communitization inyakyim tenzük, saka item ya mapa küma meinyaktetba atema sasar, ta paisa ashi.

"People's Bridge yangluba nung loktii shilem agiba atema tenüngsang agütsür. Nenoki tangar dang tansütsü tajung ka sayuogo aser maneni terenlok mapa inyaksü atema sorkar department tem aser lokti

amalitepa inyaksüla" ta Rio-isa metetdaksü.

Iba sentong nung ECS founder aser CEO Chingmak Chang menden liasü aser Hans Foundation züngsem Brig Shalendra Katariya-i o tatsü ka jembi.

"Gari lenmang nung culverts yanglutsü atema ano Rs 6 lakh tenla agütsütsü. Hans Foundation ajanga Nagaland nung state-of-the-art health care services 2 yanglutsü alizüng lir" ta Shalendra Katariya-i ashi.

People's Bridge indang kaketnu ka nung ashiba agi Nagaland kübok Myanmar den arrtsüa aliba Eastern district tem ya tangar memenepba district tem lir aser wadang aika nung mapa inyaksü nungdaker.

2010 küm Directorate of Health & Family Welfare nung taoba principal secretary, Menukhol John-i Longpang PHC semdanga liasü. Iba mapang ECS-i NHM den olemteptsü tenzük liasü. India nung nübortem dang doctor aser nurse shimba PHC ji Longpang PHC lir. Ajisüaka, parnok indang itasenbo Department of Health and Family Welfare ajanga agütsür.

Nübortem temang anema alitsü atema nungdakter agütsütsü atema ECS-i Longpang PHC tenzük. Iba ya Department of Health & Family Welfare aser nübortem tsüngda Public-Private Partnership model nung inyaker.

Yipden 20 aliba PHC ajanga tangbo mapang ajak nung services agütsür. Iba PHC nung X-ray, Ultrasound, ECG, CBC, biochemistry analyzers, mother-

child center, labor room aser neonatal resuscitation equipment lir.

Meta talang pilar aliba yimtem nung alirtemi PHC-i arutsü atema timtem ajuru aser iba jagi PHC meketa aliba yimertem gari lenmang ajanga sendakteptsü jembitep. Ayong temdanga apu maliba ajanga yim 8 nung alirtemi ghonda 3 shi agia kilometer 30 jajar ang PHC atong.

Iba jagi yimdaklirtemi apu ka yanglutsü atema senotsü bendentsü lemtet aser parnoki Yijung ayong nung apu ka yanglu. Saka tia makai, iba apuji tzümtsüng agi ponger oadok. Ajisüaka, nübortem maneni ayonglangleni lur apu ka tanaben yanglutsü lemtet.

Apu tanabuba yangluba nung village council tem aser arogotem tongti shilem agi. Iba nung SHG tetsümetem aser mother club züngsemtemia külemi yaritep. Iba nung ECS-ia teyari agütsüsema yaritep.

PWD, MGNREGA, BRO, DEF Tuensang, Assam Rifles, local MLA, kija aser ECS medemertem tsüngda yaritepa iba apu yanglutsü tenzük.

Iba mapa nung tongti tenla agütsürji HANs Foundation lir aser parnok sen endokba nung 60% tashi agütsü.

Maneni, lanurtem aser arogo aikati apu aser lenmang yangluba nung yaritepa liasü.

"Iba teyaritep ajanga 10 km link road aser 70 feet bridge ka yanglutetogo. Iba ajanga sorkar, tenla agütsürtem aser lokti ajanga mapa tulu inyakba kuli agütsür" ta People's Bridge indang kaketnu nung shia lir.

RPP-i Dr S.C Jamir nem tenüngsang agütsür

Dimapur, November 9, 2021 (TYO): Dr. SC Jamir nem Padma Bhushan agütsüba atema tenüngsang agütsür aser iba ya Naga nung ajak atema konang lir, ta Rising People's Party (RPP)-i metetdaksü.

Dr. SC Jamir-i yimtenren mapa nung shilem agia arubaji shinga den medemangtsü makok. Pa ya Interim Body nung züngsem ka, 16- Point Agreement nung sign asür ka,

Nagaland nung mezüngbuba Lok Sabha züngsem, CM punguben tashi inyak, Rajya Sabha züngsem aser state 4 nung Governor inyak, ta RPP-i sangdong ka nung ashi.

Dr. SC Jamir anemertem pa aijaka pa tenüng putiotsü nung teti atema zülüoka ayutsü. Puitotsü nung pa indang senmang yutsütsü aser RPP-i pa nem arishi dalang moajang ta sarasademtsür ta sangdong nungsa ashi.

COVID-19 Nagaland: 13 dak putet & 14 taneptsü angu

Kohima, November 9, 2021 (TYO): Nagaland nung Mongulbarnü nisung 13 dak COVID-19 putet aser 14 taneptsü angu.

"Tanü putetertemji Dimapur nung nisung 4, Kohima nung 2 aser Kiphire o Wokha nung kaka (1) liasü" ta Integrated Disease Surveillance Project atema State Nodal Officer, Dr Nyanthung Kikon-i metetdaksü.

"Taoba ghonda 24 tsüngda COVID-19 puteta alir nisung 14 taneptsü angu. Parnokji Dimapur

nung 6, Phek nung 4, Wokha nung 3 aser Kohima nung 1 lir" ta pai ashi.

Nisung 31,951 rongnungi 30,035 taneptsü nguogo aser ibaji taneptsü angur 94% lir, ta Dr. Kikon-isa ashi.

Tang nisung 180 anepaludar saka parnok 147 dakbo shirangba yimya kecha mali, ta paisa shisem.

"Hombar tashi nung nisung 714,814 nem COVID-19 vaccine indang dose 12,23,395 agütsüogo" ta State Immunization

Officer, Dr Ritu Thurr-ia ashi.

Vaccine agirtemji frontline workers 60,964, healthcare workers 15,998, arishi küm 45 ser temapur 203,049 aser arishi küm 18 nungi 44 tsüngda alir 434,803 lir, ta paisa ashi.

"Vaccine agirtem rongnungi nisung 508,581-i dose anaprong agiogo. Parnokji frontline workers 48,115, healthcare workers 13,435, arishi küm 45 ser temapur 164,527 aser arishi küm 18 nungi 44 tsüngda alir 282,504 lir" ta Dr Thurr-isa metetdaksü.

Zhaleo Rio-i DTF Dimapur nem tenüngsang agütsü



Deputy Commissioner, Dimapur indang Conference Hall nung November 9, 2021 nü District Planning & Development Board, Dimapur pur senden amenba mapang Advisor, Sericulture, Excise and Minority Affairs aser DPDB Dimapur, Chairman, Zhaleo Rio-i jembidang tangokba noksa ka yangi angur.

Dimapur, Yimpoksüi/Nov. 09 (TYO): COVID-19 tashidak wara anema raraba nung vaccination shilem 100 tongtetba atema Dimapur District Task Force züngsemtem nem Advisor, Sericulture, Excise and Minority Affairs aser DPDB Dimapur, Chairman, Zhaleo Rio-i tenüngsang agüja liasü.

November ita atema District Planning & Development Board, Dimapur pur senden November 9, 2021 nü mendenpuba sür agiba mapang, Kohima nung High Power Committee pur senden amendang district nung vaccination drive takok ngua agitetba atema Dimapur DTF, Frontline worker, lenirtem aser sendaktepa aliba department tem tushia jembi, ta Zhaleo Rio-i ashi.

District kübok urban area nungbo vaccination ya shilem 120 dak tema takok nguogo, aser yimtak-yimtsüngtem nunga takok shilem 100 angutsüla, ta DPDB Dimapur mendenpubai ajungshi.

Pai maneni DTF aser

tanishirtem dang nüburtem mozü dose anaprong agitsü asoshi iba mozü agiba tajangzük ya nüburtem nem metetdaksütsüla aser ajungmesotsüla, ta shia liasü.

"Ibai asen official duty ka ama agizüka inyakti," ta Zhaleo-i ajungshia liasü.

Senden nung züngsem ajunga arua adenba aser shilem agiba atema DPDB Dimapur mendenpubai pelaba lemsatep aser ano tarutsü anogotem nunga maneni yariteptsü aser amaliteptsü ayongzüka liasü.

Taoba senden nung lemtetbatem lepa reprangshiba mapang EAC Seithekiema, GBs aser CMO Dimapur nungertemi asadanga mapang temolung süa ngutetba nung ajemdaker Neiphruolie Colony, Chumukedima Village nung aliba Life Square Society ajanga Paramedical Institute amenoktsü benokba agizüka liasü.

Ano senden nungsa Excel Children School nungja ya Dzuavian School dangi melentsü benokba onük agizüka liasü.

Iba senden nung Chairman

asur Vice Chairman, DPDB Dimapur ajanga society registration atema District Level Screening and Verification Committee tentetsü onük benoka liasü. Iba atema Committee nungya ADC tekolakba asütsü, area administrative officer, department nungi züngsemtem alitsü aser parnoki DPDB senden nung mebenokdang society registration ya asadanga jangjateptsü, ta Deputy Commissioner, Dimapur ajanga ashi. Iba onük ya senden nung agizüka liasü.

Kasa senden nung Vihokhu Village ya Model Village kuma adopt asütsü, Logos School tenüng Footprints Academy dangi melentsü, Nihokhu EAC headquarter nung aliba play ground nungja agütsütsü indang jembia liasü.

Sericulture aser Fisheries Department temi department inyakyim indang senden nung metetdaksü. Department ana yagi project balala inyakba, tang teinyakdak aser sentong balala PowerPoint nung agüja liasü.

SEN JULI (WALLET) KA SHIA ARUA LIR

Lolenwati Ozukum indang wallet Darogajan, Dimapur nung shia arua lir. Anungji, Kiburi iba contact number #9856514681 nung tongtepratep asütsü metetdaksür.

CEO-i Kohima aser Dimapur nung ketdangsürtem den senden amentsü

Dimapur, Yimpoksüi/Nov. 09 (TYO): Chief Electoral Officer, Nagaland V. Shashank Shekhar, IAS den CEO indang Office nungi lenirtemi November 10, 2021 nü Kohima aser November 11, 2021 nü Dimapur sendang tang teinyakdak Special Summary Revision of Electoral Rolls dak sendakba maparen asadanga electoral ketdangsür aser tentet balala nungi lenirtem den senden amentsü.

Parnoki Deputy Commissioner & District Election Officer, Administrative Officers, Political Parties, Civil Society Organizations (CSOs), Booth Level Officers (BLOs) aser dangartem ajurutsü. Iba mapang Special Summary Revision maparen, electoral roll tajungba

kuma yanglushiba dak sendakba onüktem jembishinütsü.

Parnoki administrative officer tem den Election Commission of India program, Systematic Voters Education and Electoral Participation (SVEEP) indanga reprangteptsü, koba Election Commission of India indang flagship programme ka ama 2009 küm tenzüka liasü.

Election inyakyim, yimya aser election indang vote agütsür nem tajungtiba nung angatetdaksütsü nükjidong nung iba sentong ya tenzüka.

Agency aser tentet balala den lungjemer nübur nem maneni electoral democracy education agütsütsü asoshi item maparen ya inyaka arur.

Lendong ajurua alir nem Security Forces-i teyari agütsü



ka tsükoka kanga mejungi yirur lia, HQ IGAR (North) kübok Spear Corps Ghaspanti Battalion ajanga teyari agüja liasü.

Arishi küm 31 tain tebur ka Kohima nungi Chumukedima-i aluba mapang iba lendong ya ajurua liasü.

Kukidolong nung aliba COB ajanga nisungba ya lenmang nung longdaka aliba ngua nursing assistant ajanga emergency first aid agütsü aser iba sülen Dimapur nung aliba Olive Christian Hospital nung anir oa yuja liasü.

Security forces temi iba ama mapa tajung inyakba atema yirur alisang kinunger aser nüburtemi pelaba lemsatepa liasü.

Kohima, Yimpoksüi/Nov. 09 (TYO): Kukidolong nung November 8, 2021 nikongdang 4:45 ako meta bike nung senzür

Dimapur Lirmenlar Telongjem lokti senden ayonger

Dimapur, Yimpoksüi/Nov. 09 (TYO): Dimapur Lirmenlar Telongjem 16 Buba Lokti Senden ya November 13, 2021

anepdang 11:00 ako nungi alitsü, ta sangdong ka ajanga ashi.

Iba senden ya Lengrijan, Grace Colony nung kimen

(S. Arepla) kidang alitsü. Iba senden nung züngsem ajaki pei kin sobutsü mera keta sobur arutsü mepishir, ta kasa sangdong ajanga ashi.



Isa Rogo Society, Mokochung Village ajanga Wb. Imcharenba Atsongchanger shibai 2021 küm HSSLC tatidang NBSE, Kohima ajanga agiba Top 6 jenjang (93.40%) den State Subject Topper (Physics: 99) ajangzüka liasü, pa nem Nov., 8, 2021 anogo Academic Excellence Commendation Certificate den Cash Award agüja liasü. Tarutsü anogotem nunga maneni yamala takok konang tajung bener arutsütsü Society pur tamang sarasadem ta Wb. Imkongchuba Lkr., Chairman ajanga ayongzüka liasü. Society züngsempur den senpet agizüker noksa nung angur.

SARFAESI Act tendangtsü shimteta aliba Committee senden jateper

Dimapur, Yimpoksüi/Nov. 09 (TYO): Securitisation and Reconstruction of Financial Assets and Enforcement of Security Interest Act, 2002 (SARFAESI Act, 2002) to Nagaland indang Application tendangtsü shimteta aliba Select Committee mendenpuba aser Chief Minister, Neiphu Rio-i Committee pur senden

ka November 15, 2021 anepdang 11:00 ako nungi amentsü jazüka lir.

Iba senden ya Nagaland Legislative Assembly Secretariat, Kohima indang Committee Hall nung amentsü.

Committee züngsem ajunga iba senden nung arua adentsü mepishia metetdaksüogo, ta sangdong ka ajanga ashi.

State nung mejangjaba nisung tasü mang ana nguteta lir

Dimapur, Yimpoksüi/Nov. 09 (TYO): Chiephobozou PS, Kohima kübok Tsiemekhuma Basa nung arem nung mejangjaba nisung tasü mang ka (tebur arishi küm 40 nungi 45 tsüngta non-local) süngtong nung sangzua lia October 9, 2021 anepdang 8:30 ako meta nguteta liasü, ta Kohima Police sangdong ka ajanga ashi.

puipuir ka aser T-shirt sentsü tanen ka semer liasü.

Nüngdakba mapare inyakba aser post mortem agiba sülen tasü mang ya jangjatetsü atema North Police Station, Kohima nung nisung tasü mang ayudak yua lir.

Iba nisung meteta alir, kinunger temi South Police Station, Kohima den 7005986018 nung tongteprateptsüla, ta sangdong ajanga ashi.

Iba nisungba ya sentsü temoro, tar feet pungo ser inch pezü shi, tekongra, track pant

(Maneni tapak 3 nung...)

Zoramthanga-i Centre dang Mizo oshi jembir chief secretary shimtsü mepir



Mizoram chief minister Zoramthanga (File photo)

Aizawl, November 9, 2021 (Agencies): Mizoram nung chief secretary inyaksü atema Renu Sharma shimba sülen Mizoram chief minister Zoramthanga-i Mizo oshi jembir chief secretary ka aginür ta shidi züluogo.

Zoramthanga-i Union Home Minister Amit Shah dangi iba temepishiba aben.

IAS ketdangsür tejen Renu Sharma-i November 2, 2021 nü Mizoram chief secretary inyaksü tenzük.

October 29 nü Zoramthanga-i Home Minister Shah dangi züluba shidi ka nung Mizoram chief secretary inyaksü atema Additional Chief Secretary JC Ramthanga (Manipur cadre) shimang ta Centre dang ashi.

Ajisüaka, Union Home Ministry-i Renu Sharma ang shim.

"Kü Chief Secretary LaInunmawia Chuaugo (Gujarat cadre) mapa nungi sodi

agiba sülen pa melena Additional Chief Secretary Mr. JC Ramthanga (Manipur cadre) shimtsü ni mepishi. Ajisüaka, Home Ministry-i Chief Secretary inyaksü atema Mrs Renu Sharma yok" ta Zoramthanga-i ashi.

"Mizo nunger teimba kati Hindi oshi mangateter aser ozü Cabinet Minister shingai Hindi mangateteper. Parnok karibo English oshi nunga timtemer" ta paisa Centre dang ashi.

"Iba ama tia ka nung Mizo oshi memetetba Chief Secretary kati mapa takok ngua meinyaktetsü. Iba nung ajemdaker India sorkari Mizoram state kümetba sülen nungi Mizo oshi mangateter Chief Secretary ka danga meshimi aruogo" ta Zoramthanga-isa ashi.

Centre nung UPA sorkar mesüra NDA sorkar süang, Mizoram state kümetba sülen nugi iba amai dang inyaka aruogo. India nung tanga state tem nung iba state indang oshi

memetetertem Chief Secretary meshimer, ta Zoramthanga-isa metetdaksü.

"Ni tetenzük nungi tanga tashi NDA den yaritepa arur. State aika nung party melentepa yarir saka Northeast state tem rongnung tetenzük nungi NDA den tanga yaritepa arubaji ni dang lir" ta paisa ashi.

"NDA den tesentaktep tajung aliba ajanga kü nem maongka balaka agütsütsü amanger" ta Zoramthanga-isa shisem.

"Ni meinyakdang taoba Congress Chief Minister nemi iba maongka agütsüogo aser tang kü nem kasa maongka magütsüra, Congress party aser tanga Opposition party temi ni NDA yaria aruba lutsütsü" ta Mizoram chief minister Zoramthanga-isa shidi nung ashi.

Pai Home Minister Amit Shah dang tetuyuba yanglushitsü aser Mizo nunger ka shimtsü mepishio.

Jorhat nung tebu aser rapitsüri jabaso tepset

Jorhat, November 9, 2021 (Agencies): Assam kübok Jorhat district nung arishi küm 23 tebur ka pa tebu aser rapitsür (step-mother) nati tepset.

Tasüsangji Kakumoni Bora ta jangjaogo aser Jorhat district kübok Teok jila nung tebu zükset.

October 31 nü Diwali

benjung amongtsü sen meshiba atema tebu Kakumoni tepset ta osang angazüker.

Jabaso tepsetba sülen tebu den rabitsür nati metsümeshidak Kakumoni indang mang miima endok. Anogo aika pa samar bushitepba aruba sülen police-i pa indang mang angu.

Kakumoni indang mang

anguba sülen police-i tebu Phanidhar Bora aser rapitsür Horumoni Dutta na apu.

Mongulbar tena Jorhat district and sessions court dangi anir ao aser idangji tebu jabaso tepsetba nangzük.

Tebui jabaso dak aou süng ka agi tekolak nung aiben züka südaksü aser rapitsüri mang miima endokba nung yaritep.

Meghalaya nung BSF-i Rs 22.28 lakh alang jang apu



Shillong, November 9, 2021 (Agencies): Meghalaya kübok East Jaintia Hills district nung Border Security Force (BSF) sepaitemi jang aika puogo.

Truck gari ka nung jang bena liasü aser India nungi Bangladesh-i bener aoerba liasü, ta BSF-i ashi.

"November 8, 2021 nü BSF Meghalaya-i shibelenba anema inyakdang Truck gari ka nung Rs. 22,28,800 alang jang bena aliba apu. Jangtemji India nungi Bangladesh-i bener aoerba liasü" ta parnoki metetdaksü.

India-Bangladesh arrtsülen BSF-i ozüing alema shibelenba

mapa anema inyaka arur. November 2, 2021 nü South West Khasi district nung BSF Meghalaya-i Rs. 1,03,190 alang Yaba süngjangtem apu.

November 1, 2021 nü Guwahati Frontier kübok BSF sepaitemi aket mozü pongdang 525 aser ganja seret 13 apu.

Assam forest ketdangsür ka 'physical fitness test' nung asü

Dima Hasao, November 9, 2021 (Agencies): Dima Hasao district kübok Haflong forest division nung forest department ketdangsür ka departmental physical fitness agidang ajungbena asü.

Iba nisung ya Brijesh Thaosen ta jangjaogo aser pa ya Haflong forest division west nung forester (I) liasü.

Department-i physical fitness test ka agidang Thaosen ajungbena ali nung laoe asü.

Idangji pa Haflong Civil Hospital-i anir ao saka doctor temi pa asüba kuli agütsü.

Dima Hasao district nung forest department kübok

Haflong forest division-i yashi nungi anogo asemnü departmental physical fitness test tenzüka agir.

Forest guard, forester II, forester I, deputy ranger, ranger, ACF ajak atema departmental physical fitness test ya agir.

"Brijesh Thaosen-i 7 km walk tenzük minute 5 shi orr ajungbena dang ali nung lao aser pa mozü kidangi anir ao saka süadoker liasü. Ajisüaka, pa kechi kodaser asü'ar kuli ano memetet" ta Haflong forest division Deputy Ranger, Raju Pokrel-i ashi.

Pa temang post mortem asütsü atema bener ogo.

Manipur CM-i civil services indang coaching classes tenzüktsü



Manipur Chief Minister N Biren Singh-i Mongulbarnü face-to-face coaching classes programme tenzüktsüba angur.

Imphal, November 9, 2021 (Agencies): Manipur Chief Minister N Biren Singh-i Mongulbarnü face-to-face coaching classes programme tenzüktsüogo.

Imphal West nung aliba State Academy of Training, Takyelpat nung pai iba sentong tenzüktsü. Iba ya Chief Minister indang Civil Services Scholarship Scheme kübok lir.

"CM's Civil Services Scholarship Scheme (CMCSSS) kübok Civil Services indang coaching classes tenzüktsüba atema pelar" ta CM Biren Singh-i ashi.

CMCSSS kübok Civil Services agütsütsü jangraba kaketshirtem atema coaching classes agitsü. Tematiba kaketshir 150 nem 100% scholarship aser tanünga kaketshir 300 nem subsidised scholarship agütsütsü aser iba nung Rs 1.6 crore shi endoktsü.

"Manipur sorkari ALS Group den yaritepa state nung lanurtem tanga state temi moi coaching classes agitsü atema iba scheme tenzükter" ta chief minister Biren-isa ashi.

Kaketshirtemji state ajungalen agiba entrance exam ka ajanga shim, ta paisa ashi.

Manipur nung hopta ka tsünga Class IX aser temapur atema offline class tenzüktsü. Ajisüaka, COVID-19 SoPs aser guidelines sülen anidaksü, ta Biren Singh-i tanü metetdaksü.

Olympians 19 indang kürakyanglu aliba Olympian Park ka kobi meliü lapoktsü, ta paisa ashi.

Iba sentong nung education minister S Rajen, MP Leishemba Sanajaoba, chief secretary Rajesh Kumar, Director general SAT Letkhogin Haokip, Director ALS Jojo Mathews, ketdangsürtem, tesayurtem aser kaketshirtem aden.

State nung mejangjaba nisung... (TAPAK 2 NUNGI...)

Ano Dimapur Police ajanga sangdong ka nung, nisung tasügang ka nguteta lir, ta ashi.

Civil Hospital gate nung arishi küm 40 shi tain mejangjaba nisung (tebur non-local) ka süa lir ta nüburtemi nungi October 3, 2021 nikondang 7:30 ako meta tebang osang ka angazüka liasü.

Osang angashir PS duty party temi iba tesem bushia oa nisung tasügang ya nguteta liasü. Iba nisungba dak tim masüba

mapa inyaka kuli kecha mongutet.

Ozüng agi melaba maparen ajunga tembangba sülen tasügang ya PM examination aser jangjatetsü atema District Hospital Dimapur Morgue nung yua lir, ta sangdong ajanga ashi.

Asür kinunger, medemer mesüra metettepa alirtemi Officer-in-Charge, East PS Dimapur (Contact no.7085055020) den tongtepratepsü metetdaksüogo.



TIR YIMYIM YIMOBILEM (EDITORIAL)

DIMAPUR RASEMNÜ, YIMPOKSÜI (NOVEMBER) 10, 2021

Election tongpang

Joko election mapang tonga arurji asenok arogo nungertem asoshi Ao Baptist Arogo Mungdang (ABAM) ajanga election nung ochishia shilem agitsü atema arürsangoktsüba osang angashir. Atangji, arogo nung asoshi tanü lima nung tanular tongpang tulutibaji election nung arogo nungertem tai memenai shilem agitsüba ya lir. Aikati Nagaland nung election merüka agitsü asoshi ayimtenba ola ya manganer aser aikati tamakok angutsü bilema sensatsür. Ajisüaka, asen lima nung sen agi vote alia aser sen yong vote yoka election agi tashi lenirtema mera makettsü aser nübertema alar tia nung alitsü. Asenoki asenoksasa asen vote yokadoker alar tia nung aliba ya memetetsüa akok, saka asenok ak ama kümer gari lenmang nung jajaba ya koda ? Asenok meshimetsür kümer pei kibonga junga memesütet, tanurtema kaketrejui meyoktet taküm raksadaksüba ya koda ? Asenok tenüng nung terenlok mapa tapu balala inyaksü sen arur saka kata meinyak ser senbo ajak agizüka chimar saka itemji anema ola madoktetba ya koda ? Kechiyong alarji alar, yokadokba aser alizüka ayuba, anungji kibur anema ola adoktsü makok. Kodaser alari kibur anema ola adoktsü ? Chia mechiyongdaksü lumidaksüyonga ojang. Iba tia nungji asenok nübertem pei menen agi peisasa ola madoktet kangshiba putuji tang putu ya lir. Atangji, election-i aiertem rongnung shiba dangbo metemsüa ta ashitsü ? Shibabo nübertem tenzüksü asoshi masü nübertem mezüngmeshitsü asoshi tatar yimsüsür kümnüba ali ? Shibaibo nübertem asoshi terenlok mapa inyaksüba sen ajunga chitsütsü tebilemba nung election-i aitsü ? Shibaibo Tsüngrem metsübur aser nübertem memeimer ta ashitsü ? Election nung tokteper candidate ajaki pei mulung nung nübertem asoshi langkabosa tajung inyaksünüa yimten tashi bushia alitsü südi ta bilemdi. Atangji, election nung tokteperitem rongnung karbo sen agi sen melentsü bilema yimten tashi bushir asütsüa akok, saka kar dak alaka election nung toktepbaji rongsen bushir masü saka nübertem asoshi tajung inyaksütsü tashi bushirtem lir. Ajisüaka, nübertem election matongdang rongsen alir takar bushia election-i aitsü ajungshir, kechiyong nübertem tebilembaji par constituency nungi parnok asoshi jembitsütsü aser inyaksütsü asoshi tetemsü yimsüsür ka aginer masü saka election mapang nung vote melen sen tera meshizüka aginer. Aji oda, senso tajung kari nübertem anepalutsü aria bilema election-i inüa yimya agi sayu nunga, joko tasüngjibo par ki sünga nübertem sen meshitsü adenshiba angutsü. Joko, election mapang atongerji candidate dang sen meshia ki yanglushitsü, gari yanglushitsü, benjong chiyongtsü, ki oset alitsü, tanurtem nungdak peritsütsü ta teinyaksü mapa aika asenok mulungjang nung bilem tenzükdar asütsü. Asenok karibo candidate dang meshia chiyongdaksütsü tebilemba nung, ashiko, taruba Christmas benjonga nangzüksüa akok. Asenok nübertem, iba tashiji yimten nung shilem agitsü atema election atar. Item nübertemji limapurtem masü arogo nungertem lir. Asenoki arogo nung ta asüadang ABAM lenirtem mesüra arogo nung pastor mesüra deacon-tem dang amai bilemer, iba jagi asenoki asenok dak tai aliba mangur. Ajisüaka, arogo nungertem asenok lir, Shidi asübo, ABAM lenirtemjibo mesüra pastorbajibo arogo nungertem shimba tenzükertem dang lir, anungji electionji parnok mulungba nung masü saka arogo nungertem mulungba nung agitsü. Kodang asenoki iba tangatetba len jagi arudir, asenok nüchi küma arua ABAM aser arogo nung lenirtemi Clean Election atema ayongzükba tongpang nungji mulungsua pei tata shilem ta angateta shilem agitsü. Idangjibo asenoki Clean election nisan asongtsü aser Clean election ken atentsü atsüayong masütsü. Clean Election Movement ya asen lima, asen kibong aser asen taküm yanglushi tenzükba sentong ka lir. Iba nung ya madenerbo Tsüngremi nokdangtsü. Aji oda, sen agi aser tashiyim agi masü saka Tsüngrem tashi nung adokba tatar yimsüsürtem aginür ta ochi mulung agi Tsüngrem dang shidi. Vote ayokba sen agi asenok kibong kwi azükarua odar ? Vote ayokba sen agi azüngba tanur kwikabo tajung küma ali ? Vote ayokba sen agi aliba osettem agi kechi tajangzük aser tepela agütsür ? Ano külen, Vote alia adokba election nung kechi janngatem ali ? Aser vote alia adokba ajanga bendenba rongsentem dak tashikang dener yima oadokba ya koda ? Asenokbo joko vote ojang yokdi aser vote ojang alidi. Tangbo Clean election wako temesüng dang masü saka temerema songdi aser ochishia pei vote peisasa agütsütsü sarasadema atadi.

OLEMSABANG

ABAM Sanen Luden temenen agi kangbanga lir, temeim agi kümzükang

~ S. T. Yapang Lkr. Kohima

Temenen asüyonga tongtiba Belzebul koba Mathi 12:24 nung shia lir, ibala agi asen ABAM Sanen Luden kangbanger kechiang mashi kanga timtemdaki, anungji iba osang azüngertem tesempatep agi masü temeim agi ABAM kümzükang ta ajungshia zülur, kuliji kechisa süra yamai;

ABAM-i mapang shia jembiba/züluba SLT/2020-07 Sanen Luden telemtetba ta sa amshir (Molungyimsen dangi züluba No.AB03A32/2020-21/125 Dated Impur the Oct 29, 2021 nunga aji shisema lir aser yaküm Molungkimong asü Molungyimsen koba dangi zülur memeteti paipara züluba shiti No.AB03A32/2019-20/87 Dated Impur the 9th April 2020 nunga aji shisema lir), iba telemtetba nung "Dec 22, 1872 nung Molungkimong nung mezüngbuba Ao Arogo tenzük aser tanga Ao Arogo ka danga metenzüki liasü, iba tangatetba nung ABAM noktaka lir" ta shia lir, aser Dec 23 (iba mapang 23 ta amshia liasü) 1872 nung tenzükba arogoji amangba pur yim tasen akümdangji bener ait... ta kanga jangja ABAM 1986 telemtetba asenoki Tir Yimyim Yimpoksüi 06, 2021 anogo tapak pezü Olemsabang nung jangja züngogo. Anosa ABAM nükla 2030 mesüra ABAM Temzüng (Revised 2016) anaprong nung 1986 ABAM telemtetba magitsü indang shia mali, aser lemtetaa maka, anungji kuli maka sür kechiba ABAM Executive Secretary süngyangu külemtsüba masü Tsüngrem tenüng asangtsüba sentong ka nung shilem agitsü songtemer?

Tanabuba nung parnok (ABAM Sanen Ludeni) ochi kuli ka samatsür tiyazü kuli ka metentsü asoshi Impur Museum nung Noksa tsünglanglen ozülü yamai ka zülua lir. "A Portrait Depicting the first arrival of the Gospel to Dekahaimong (Molungkimong) village of the Naga Hills in 1872. Right to left: Godhula (Assamese Evangelist) Süpongmeren (First Ao Convert) Dr. E.W. Clark, Mrs. Mary Mead Clark and the Dekahaimong villagers."

Merangkong nung arika kidang Longjanglepük noksa ka nung "Longjanglepük, the first Ao Naga Christian Convert from Merangkong village, Baptize at Sibsagar in 1851" ta zülur nguogo, süra ya Süpongmeren tama tzüsena lira Merangkong nung asoshi temelenshitsü ka lir, aser ABAM-ia Merangkong nung dang aji kuli tejangja agi shitetsüla, kechiyong ABAM-i zülur yua lir. Süpongmeren tzusenba kuli tejangja makara Nokinketer Mungchen koba ABAM ajanga rongsen aser nübu jenti lalua kuli bendener 1972 küm adok yangji zülua aliba ama Longjanglepük-ji Ao Naga mezüngbuba tamanger/tzüsener asütsüla. "Süpongmeren shiba mapang talangka Godhula aser Dr. Clark den tesayur ama liasü, aser pa ajanga Naga limai Godhula aser Dr. Clark tutetsüsa lemang aika bushitet, pa tenüngbo item baptiba telok ana nungji ka nunga tensema mangur." (Nokinketer Mungchen tapak 40).

Anungji iba mapa ya shir mapa? Tangsa tejen inyaker kar mapa asünunga jar arua tatok meshia kaktokdaksütsüla, yamaji mesüra iba temenen tera ABAM madak teti munga alitsü.

Sanen Luden züngsem ya shirsa nibo memetet, saka tekaraba nung pei arogoi tekolak nung nemeta temenen tanela tulutiba koba Belzebul ajanga sayatenyadagi ya samajang ta sarasademsüba den "Tekaraba nung Sanen Luden nungi anenang" ta ashitsüla, Aji mesüra asenoka iba temenen ajanga ABAM tiyazü tebu akümba nung tongti shilem agir kaka asütsü. Sanen Luden puri nütsüng ajak dang teka mekanga tatok meshirang tekaraba nung pei sasa anentsüba dak alema tanga lenmang mangur, nenoki Süpongmeren tasür dena timtemdaksüa Naga nung rongnungi mezüng temulung meyipa tzüsensang ta züluba ajanga ABAM ya tiyazü tebu ka kümdaksü, masüa na?

Iba osang azüngertem ABAM Sanen Luden temenen nem tekong tashi meyokdaksür tangu agi matang aliba ya laodaksüdi süra ola madoki yujang, saka ABAM aser Sanen Luden iba temenen nungi kümzüksü tim ta bilemra tanur tain ta mali, oda ola ka danga adokang, tatishitsü agi "ABAM Sanen Luden tekaraba nung tatok meshir pei sasa anenang" "Supongmeren tzusenba kuli tejangja mengura tangsa Impur Museum nungji melenshiang, koba ajanga alima dang ABAM tiyazü tebu ta kuli asür" ta zülutsü takoktsü lir.

Asen Ao lima Khrista yimsü arua limapur longsua aliba mapang yim tasen asem aküm, ibaji Molungyimsen, Meküli, aser Changtongya Yimsen par asemprong yim akümba anogo aser küm dang nungi arogo tambu, kechiyong tanga nung tenzük aser aji munga arudar aser ajak nungji ABAM ajanga tim shilem agia arudaki, anungji tang Molungyimsen nung kuli kecha makai kodsür madentsü aji amangba purtemi pei shilem ta angateta tasü ita nokdaksi aser ABAM Sanen Ludeni anir temenen nung asonga samatsü aliba nungi asenoki kümzükdi.

ABAM kübok aliba clean election luden mesüra tanga tentet, temenen mapa anemba teloktem yimlibilema khen anena liang aser asen tebu ABAM Sanen Luden temenen tanelai tekong tashi meyoker tangu agi dang matang alibaji tama atsütetang.

Tang ABAM Sanen Ludeni telemtetba meyipa magili süra pa alima tsüngdang tiyazü tebu ka akümba dang masü ano okadaki ao nunga yanggia longdaka aitsü südi, aser yimya agi joko yamala mejembidi süra ojang, saka jembitsü süra tang ya mapang tajung asünungji Molungyimsen council mesüra kaketshirtemi okadaki ABAM anema kuli tejangja bener ao nung ABAM nem asenoki ter shilem aser temulung tenla agütsüba sen agi keno agitepa senzütsüba, repringang ABAM khen mebilemdangi ochi mashi mapa ka nungi pungteta madoknüi kazüadang temen taaji koda? Ano ABAM-i okadaki mao toktsüdi sür mao yonga okadak nung jaki telemtetba kabosa agütsütsü, ABAM maru agi okadaki aji tsüba malitsü mesüra o leptang magütsütsüa masütsü südi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

India, Russia aser Syria linüktemi religious freedom anema inyaker: USCIRF

November 09, 2021: United States Commission on International Religious Freedom (USCIRF)-i US State Department dang, alima nung religious freedom anema tamajungtiba inyakba linüktem rongnung India, Russia, Syria aser Vietnam linüktem züngoktsüla, ta mepishiogo.

USCIRF indang annual report nung ajemdaker tan ita US State Department-i Country of Particular Concern (CPC) list nung züngoktsü mesüra Special Watchlist nung züngoktsü atema telemteba agitsü, ta osang angazüker.

USCIRF-i sangdong ka ajanga, CPC nung züngoktsü atema parnoki State Department nem linük tasen pezü tenüng agütsüogo, ta metetdaksü.

US State Department-i "CPC" nung züngokba linüktem nem teyari aser maongka balala magütsür, iba nungji rongsenkettsüng tsütsü teyari magütsüba densema lir.



USCIRF-i, "CPC nung züngoktsü atema USCIRF-i agütsüba linüktem rongnung India, Russia, Syria aser Vietnam densema lir. USCIRF-i SWL nung züngoktsü atema tenüng agütsüba linüktem rongnung Afghanistan, Algeria, Azerbaijan, Egypt, Indonesia, Iraq, Kazakhstan, Malaysia, Turkey aser Uzbekistan linüktem lir," ta metetdaksü.

Tesüiba küm ishika tsüngda India nung Khristantem anema inyakba kanga bulua kümogo. Tang

alima nung Khristantem tamajungtiba reshikangshiba linüktem rongnung India ya jenjang 10buba nung lir.

Ajisüaka India sorkar pusemertemi USCIRF dang CPC nung India mezüngoktsü atema tamalena mepishia liasü.

"Hindu nationalist sorkari parnok pusemertem ajanga Washington nung India atema USCIRF-i recommend asübaji agientsü atema inyakba atema Indian American Khristantemi tebilemtsü akar," ta Washington, D.C nung aliba Federation of Indian American Christian Organizations nung Chairman, John Prabhudoss-i taküm April ita nung metetdakja liasü.

Taoba ita meimchir temeden atema inyakba telok balalai, taküm India nung September ita tashi nung Khristantem anema inyakba tatalokba 300 dak tema aliba osang metetdakja liasü.

ANO GO ABEN TSÜNGREM DEN

Tsüngremer telangzüba mission sapi

Oba, na kechi koda kü dak lir aser ni Ne dak lir, yamaji parnoka asenok dak lidakjang, anungji Nai ni yok ta alimai amangtsü. Yohan 17:21

Samaa aliba lima alangzüba mission nung Tsüngremi aiben meimchir tesendaktepji shilem ka ama jembir (Yn. 13:20; Matt. 25:40). Kuli kaji temeshi metsü, aji chirtem tajung sotettsü aser parnoki Tsüngrem dang tashi angatsü aser parnok Tsüngremer mission nung amshitettsüsa alitsü (Mal. 2:14-15). Kasaji, arogoji Khrista temang lir. Arogo nung Tebu den mission ka nung alitsü makok (1 Kor. 12:12). Asen meketa alir tekümtet asoshi asenok o asenok na tsüngda tesendaktepji kanga tongtipang lir.

Yisu kangki-i matudang Pai nütsüngtem tasü itta alitsü, mesüra tamang katetta alitsü, mesüra Pai kechi sayu aji bilemteta alitsü sarasademer alitsü ta asenoki bilemtsü akok. Aji saka Pai parnok kati ka den meimtepa alitsü sarasadem. Tsüngrem meimtsü saka tangar dang memeimshitsübaji tanelaren tamakoktsü ta Yisui angatetta liasü.

Nai Tsüngrem meimba tetentangbaji nai tangar dang meimer asü masü aji shisadangtsüba lir. Asenoki ashir, "Kotak nung aliba Obala, tebilemtsü Na aser ni tsüngda nung masü. Ni kü mulung ajak agi na meimer. Ni tangar dang memeimtetter." Aser Tsüngremi ashir, "Ibaji tamakoktsü. Tangar, shirnok asoshi Kü chir asü parnok dang memeimra nai Ni meimtsü makok" (Yn. 13:34-35). Na meketa aliba khristantem den lungjema melira nai Khrista dangi tangar anir arutsü makok.

Pastor temi Laishiba nung shin otem indang sayutsüngitsüla: Jack Hibbs

November 09, 2021: Pastor tem shirnoki Laishiba nung shin otem aser tatem anogo indang sayutsüngi masür, parnoki Laishiba shilem 20-40 shi nungi santem nem tesayuba magütsür, ta Southern California nung aliba Calvary Chapel Chino Hills nung pastor, Jack Hibbs-i metetdaksü.

Calvary Chapel nung shin o dak sendakba nung tasüngdangbatem aser telangzüba sentong (Prophecy Q&A event) ka agiba mapang nung Hibbs-i iba o ya jembir.

Kasa sentong nungji Olive Tree Ministries nung Director, Jan Markell, Costa Mesa, California nung aliba Calvary Chapel Tustin nung Pastor, Barry Stagner aser melungtet telok- Behold Israel tentetsang, Amir Tsarfati nungeria jembia liasü.

Hibbs-i pastor tem dang, Laishiba nung aliba shin otem mesendoktsüla, ta ashi.

"Jungkai Adok tapu 19 ajanga asenok dang, 'Yisu Khrista ya shin o tanela lir' ta ashir. Yisui yamai ashir, 'Ni nenok dang item ya jelia metetdaksür, kechiyong nenoki Ni shibaar metettsü'" ta pastor Hibbs-i ashi.

Paisa, seminaries kar nungbo joko Laishiba nung shin otem nungi tesayuba magütsür; Tsüngrem O aser shin otem, Messiah aser tekümtet indang tesayuba magütsüba nungji timtem lir, ta ashi.

"Theology doctorate angutsü atema nisungtemi dollar sen 100,000 indoker aser Arogo ka nung pastor akümtsü imlar. Parnoki amangnüaka mamangnüaka asen meketa aliba lima ya shin otem agi



longbanga lir. Iba ya atalokdar aser parnoki kechi inyaktüar memetet. Parnoki kechi ashitsüar memetet, anungji parnoki ibaji (shin otem) paidokder, kechiyong seminaries nung parnok nem item tesayuba magütsür," ta Hibbs-i ashi.

Behold Israel tentetsang, Amir Tsarfati-i, "Ainkartem aser shin otem nung mamangba atema Yisu-ia Pa nütsüngtem arrja liasü, kechiyong parnoki tekümtet atema Tsüngrem sentong mejangjai liasü," ta ashi.

Tsarfati-ia pastor temi shin otem indang tesayuba agütsütsüla, ajisüaka shin otem indang sayutsüngi masüba agi nisungtemi Tenla kidangi aoba manentsüla, ta ashi.

Iba ama tensa ka nungji pei Arogo nung shin otem indang tesayuba magütsüra Khristantemi Laishiba nung shin otem aser ainkartem indang

angatettsü atema tanga lenmang-a bushitsüji kanga tongtibang, ta pai ashi.

"Nisung karibo 'ozü kidang nungi anasatiba Tenla kiji mile 10-20 pilar lir' ta ashir. Tenla ki ana nung melira tanga lenmang nungi tanela chiyungtsü bushitsüla. Online ajanga tanela chiyungtsü bushitsü akok, kechiyong online ajanga nisung aikati Lai nung aliba shin otem indang tesayuba agütsüba asenoki reprangtettsü," ta Tsarfati-i ashi.

Calvary Chapel Tustin nung Pastor, Barry Stagner-i, ainkartem aser shin otem sendokba sayutsüngirtemi jembibabo ni mangar, ta ashi.

Stagner -isa, pastor temi Laishiba nung shilem kar mesendoktsüla aser pastor temi Laishiba nung keta aliba shilem ajak angatettsü atema meranga study asütsüla, ta ashi.

"Shin o aser ainkartem ya

Laishiba nung shilem ka lir. Shilem karbo tasak ta bilema mesendoktsüla. Asenoki tasak ajak sendokra asenoki hopta shia Yohan 3:16 indang ang jembitettsü, kechiyong ibajibo nisung ajaki meteta lir. Laishiba nung shilem karbo angatettsü mesüra sayutsü kanga tasak," ta Stagner-i ashi.

"Laishiba nung shilem ajak junga angatettsü atema kanga study asütsü nungdak. Talisa asen aliba putu nung Laishiba shilem ajak jungjunga angatettsü nungdak. Yamaji inyaktü atema ajaki memelunger saka pastor temibo ibaji inyaktüla," ta pai ashi.

Iba sentong tatembanglen shilem agirtemi tatem anogo aser anti-Christ alimai arutsü onük nung o lemtepa liasü.

Hibbs-i, "Laishiba ashir [anti-Christ]-i alima ashioktsütsü. Rongsenkettsüng dak sendakba langka chireptsü

aser rongsenkettsüng atema langka nungdaktsü. Iba telangzübaji anti-Christ nungi angutsü aser pai tesünep bener arutsütsü, kechiyong lendong tulu alitsü," ta ashi.

Tsarfati-i, tamanger kati Yisu tanaben alimai arutsü atema meyongyara pa/la dak langka tai lir aser pa/lai Laishiba junga mangatet, ta ashi.

"Tamanger kati Yisu Khrista alimai arua kodaki anir aotsü atema yongyatsüla. Pai meyongyara pai Laishiba junga mangatet aser Khristan tetezü junga memetet," ta pai ashi.

O lemtepa sentong nung jembir ajaki, tatembang anogo nung alima ya tang amai masütsü, ta bangjema liasü.

"Tatem anogo nung alima ya khenyongi melenshitsü," ta Stagner-i ashi.

"Khenyongi ajak melenshitsü. Nü melungjang nung kodak yimli lira nai mapa tajung aika inyaktü, kechiyong nai akok tashi nisung timba kodak lenmangi aninütsü. Tsüngremi asenok nem tenyaba mapa agüja lir. Tasü lenmang nung jajartem kümzüksüji asen mapa. Asenoki tanelatem kümzüksüla. Tsüngrem tenüng nung mapa inyaktüji jangratemtsüka lir," ta paisa ashi.

Tatembang anogo nung tatalokbatem dak sendakba nung Tsarfati-i, lendong aliba mapang tesünep bener arutsütsü atema alimai anti-Christ agizüksü; Khristan kati Yisu junga jangjatsüla, kechiyong Pa alimai tanaben arutsü aser Pai Pa sülen anidakertem nem Pa wadang inyaktütsüner, ta ashi.


OLONG PAITEP # 5992

1			2			3			4	
			5		6		7			
8										
			9							
	10									
									11	12
			13				14			
15						16				

- | | | | |
|----------------------------|-------|-----------------------------|-------|
| TIPIEN | | LANGTSÜNGLEN | |
| 1. Anenzükdak ki | - (5) | 1. Reprangdaksü | - (4) |
| 3. Asür mangyimba | - (5) | 2. ___ ur | - (3) |
| 5. Temulung nung shisadang | - (5) | 4. Kiojen yangludak | - (6) |
| 8. T ___ lu | - (3) | 6. _____ ait | - (7) |
| 10. Takdang temalen | - (9) | 7. Nagaland nung ayong ka | - (5) |
| 11. Tesa ___ a | - (3) | 9. Küm kasa purtem | - (5) |
| 13. Ajungbena temulungjang | | 10. Tetsüng tajemetdak | - (6) |
| tongtonglatsü atu | - (5) | 12. ___ adenshi | - (4) |
| 15. Tejen lai nung tesayur | - (5) | 14. Tsünusenbongtsü adokdak | - (3) |
| 16. Tsüngsak-mopung | - (5) | | |

OLONG PAITEP # 5991 TELANGZÜBA

- | | |
|---|--|
| TIPIEN : | LANGTSÜNGLEN : |
| 1. Kasa, 6. Rangben, 7. Mait, | 1. Khu, 2. Sùjak, 3. Onük, 4. Oba, |
| 9. Poktet, 11. Ati, 13. Atasa, 16. Rür, | 5. Anü, 6. Ratet, 7. Mozü, 8. Ita, |
| 17. Rajang, 20. Lanu, 24. Nüngjem, | 10. Tar, 12. Tinu, 14. Salem, 15. Aja, |
| 25. Süra. | 18. Anünü, 19. Tajü, 21. Ano, 22. Onü, |
| | 23. Kua. |



ASEN YIMTSÜNG NUNG TSÜRATURTEM PEI CHIRNUR AZÜOKTSÜ ATEMA YIM MUNG DANG AMUNG NUNG KODA SÜLA?

Kiyonger 1 : Hoi nenok ajak jung dang lir ma? Oda talangkasa majurudanger atu, aser ner dangia yimsüsür karbo arudanger na?

Kiyonger 2 : Hai oda onoka tanü tashibo ajak junga dang lir ako. Haujatu tanep ya ozü kinunger ajak menteba lia asen yimer yimsüsür kar arua oda asen yimtsüng nung lanurtem libaliro ajak nung kümdangshia mepetmesü meleli liromedema tali longjemshia alitsü mechi nung asüng asen yimtsüng nung tsüraturtem ajak yimteni chiyongdakja mungdang ka ayongzuka linür ta shia aruaja.

Kiyonger 1 : Hauni tanep ner dangi yimsüsür kar arua ashibaji oda aseni khen bilemsü agibo oda parnokia asen yimtsüng nung talisa lanurtemji kangasa aria bilema jungdaksünüa ali sülaba, saka oda ni ashitsü agibo asen yimtsüng nung lanurtemji libaliro ajak nung azüoka alitsü atema sayubentsü agüja yimer yimden senbong nungi khuret süa mungdang amungtsü melenbo oda asen yimtsüng nung kibong shia pei kilong nung tanurtem dang pei tsürapuri akok tashi sayubentsü tajung agüja litet nungbo yimden mapang intoka mungdanga mamung nunga kecha balaka mali ta nibo bilemer.

Kiyonger 2 : Haujatu, oda nai ashiba ama tanurtem tsürapuri anogo toklanga mungdanga mungaka aji senshir pei kidangi oa tanurtem den sayubentsü agütsütsü memetetra item ajakji tsürong nung ken tentok ama dang akümtsü.

Lilir : S. Repa Pongener, Mon Bosti, Assam.

TANÜBO NAI LANGZÜANG

Q. 'Bestu Varas' ya koba State indang New year benjung lir.
 [A] Karnataka [B] Gujarat [C] Maharashtra [D] Tamil Nadu
 _____ (Taruba adok nung onoki langzüsü)
YASHI ADOK TELANGZÜBA : State Bank of India

AO OSHI ANGAZÜKDAK:

TANÜ ANGAZÜKTSÜBA OJANG

Lenbu
 (v) kibong akümyim (matrimony)
 * Kidong kibalemburtem **lenbu** mazüker.

Lenrep
 (v) arem nung süngdong ajak lensükba (complete deforestation)
 * Asen lima arem nung süng tulu ajak **lenrepogo**.

Happy Birthday

TENÜNG : ZÜINTULA
KÜM : 8
Anogo : 10 November
Talidak : Old Showuba
 'Happy birthday TUTU'

Tsüngremi ZÜINTU arishi talang den taküm temoatsü aser takok nung len aniangma.
 - Odi Anoker, Benben Oja & Oba

NAI-A YA METETTER MA

- NOVEMBER 10 NÜ ASOR TONGTIBANG NISUNG KAR:**
- PROTESTANTISM NGUTETSANG MARTIN LUTHER (1483)
 - ENGLISH ARTIST/ENGRAVER, WILLIAM HOGARTH (1697)
 - INDIAN POLITICIAN & SCHOLAR, SURENDRANATH BANERJEE (1848)
 - ACTOR RICHARD BURTON (1925)
 - AMERICAN INDIAN RIGHTS ACTIVIST/ACTOR RUSSELL MEANS (1939)
 - LYRICIST TIM RICE (1944)
 - COUNTRY SINGER DONNA FARGO (1945)
 - ROCK MUSICIAN GREG LAKE (1947)
 - ROCK MUSICIAN DAVE LOGGINS (1947)
 - FILMMAKER ROLAND EMMERICH (1955)
 - INDIAN PHILANTHROPIST NITA AMBANI (1964)
 - ACTOR MICHAEL JAI WHITE (1967)

SUDOKU # 6033 TELANGZUBA # 6032

	6	1		7	3	2	4		9	4	6	2	1	7	8	3	5	
3				8		6			1	2	8	7	5	3	6	1	4	9
				9	1		6			5	1	3	4	9	8	6	7	2
	4	5	7			3		8	6	3	5	7	8	9	4	2	1	
	8	3	6				9	7	7	2	4	1	5	3	9	8	6	
	1	9		2	8				8	9	1	6	2	4	7	5	3	
		6				9			4	7	9	3	6	2	5	1	8	
9		8				7		6	3	5	8	9	7	1	2	6	4	
	3	7	1	6	9	8	5		1	6	2	8	4	5	3	9	7	

OJANG LUTEP # 5579

- NGATARI :
- JIBEMBA :
- AKAJ :
- ANGAMA :
- JIIBA :
- CHOI :
- MAA :
- OKTSPRÜ :
- DAKNÜNG :
- OKEMADR :

OJANG LUTEP TELANGZÜBA # 5578

AIBEN JEMBR TASHI MANGARA AIBELNER NEM
 TEMERENSHI AGÜTSÜTSÜ LANGA LIR

TAN HOPTA ATEMA - KOMA SÜLA ?

Q. Akhidang ama, ABAM kübok lanurtem ya küm shia lanur mungdang (Youth Convention) ya Impur nung dang melii, tagizüker dang lira, yimtsüng aser town arogotem nung among nunga koma süla ?



Shastri Bhawan, New Delhi nung LPG cylinders jenjang ajungketba aser linük ajunga nung oset jenjang tali akümba anema longkak aitba mapang LPG cylinders noksa amer longkak aitba noksa nung angur.

Centre-i totzü nungi aazükba sen state nem lemtsütsüla: Mamata

Kolkata, Yimpoksüi/ November 9 (Agencies): Centre-i tawa totzü jenjang ajungketba ajanga sen lakh crore 4 aazükogo, ta shia West Bengal chief minister Mamata Banerjee-i Mongolbarnü iba sen ya state tem nem kasasa lemtsütsüla, ta ashi.

Assembly session ka nung Banerjee-i, state pongu nung taruba election dak rangloker Union sorkari tawa petrol aser diesel nung excise duty ajemtsüogo, ta ashi.

"Centre sorkari cooking gas, petrol aser diesel jenjang ajungketter ayongba ajanga sen lakh crore 4 aazükogo. Tang

BJP-i state nung VAT ajemda克斯ner. State tem sen kong nungi arutsü? Centre-i sen lakh crore 4 ya state tem nem kasasa lemtsütsüla," ta West Bengal assembly nung jembiba mapang lai ashi.

CM-isa, rongsenketzüng nung tetsükdaktsü adoker liaka state-i subsidy balala agüja arudar, ta ashi.

"Election atongtsü lia parnoki (Centre) jenjang ajemtsür. Election tembangba sülen parnoki jenjangtem tanaben ajungkettsü. Totzü jenjang dak sendakba nung onok nem tetuyuba balala agütsürtemi tamasa state

sorkar sen kong nungi arutsü aji langzüksüla. Union sorkari onok tangutsü tim fund magütsür," ta lai BJP aija ashi, shirnoki totzü nung VAT majemra longkak aittsü amokmerenogo.

Banerjee-isa, vaccine alemba mapang Centre sorkari tanga state dang beshiba ama Bengal dang mebeshiba atema aitsüogo.

"Uttar Pradesh amala state tem nung vaccine agütsüba dang nungi onok nem vaccine kanga agi tajemba agütsü. Onoki vaccine dose ka danga melalutsü atema inyakogo," ta lai ashi.

CM Channi-i Sidhu takhangba agizük

New Delhi, Yimpoksüi/ November 9 (Agencies): Punjab Congress party yongtsü nung tashi atema toktepa mapang Navjot Singh Sidhu-i maneni takok ngua chief minister Charanjit Singh Channi-i state advocate general indang resignation agizükogo.

Sidhu den külemi osangbenertem den sensaksemba mapang chief minister-i iba osang sangdonga liasü aser iba ajanga tongtibang mapatem atema ketdangsur shimba nung lenir ana tsüngda mangatettep adoker aliba süngjemshiba ama angateter. State DGP IPS Sahota aser

advocate general APS Deol na shimba ya Sidhu-i ajang ajanga anema aruogo.

Sidhu-i anemba tanga ketdangsurtem dak sendakba nung Channi-i, "onoki küm 30 dak tema service nung aliba police ketdangsurtem tenüng yokogo. Parnok rongnungi Centre-i anogo ishika tsüngda panel ka yoktsü. Onoki iba panel nungi director general of police (DGP) tasen ka shimtsü," ta ashi.

Kasa mapang nung Sidhu-i, APS Deol shimba anema liasü, kechiyong pai 2015 küm police temi longkak aiterem dak injang agi akhaba tatalokba ka

nung pai taoba Punjab DGP Sumedh Singh Saini tenüng nung nokdaka liasü.

Punjab Congress tekolakbai Hombarnü Punjab sorkar nem tezüluba nung takhangba ka agütsü aser pai iba ketdangsur ana mapa nungi agintsü khanga liasü. "Nenoki item ketdangsur ana ya mesera PPCC tekolakba shimang," ta pai ashi.

Taoba Honibarnü Punjab advocate general APS Deol-i Sidhu aija, pai AG office inyaksangshi nung tetsükdaktsü adokdaktsür aser yimden yimsüsüba tsütsü tajangzük agitsü atema osang tai prokshir ta ashi.

Voters list asadangshitsü benokba magizükra longkak aittsü: Akhilesh

New Delhi, Yimpoksüi/ November 9 (Agencies): Samajwadi Party (SP) tekolakba Akhilesh Yadav-i Mongolbarnü ashiba agi, Uttar Pradesh nung 2022 küm assembly election agitsü lia political party tem nem reprangshitsü atema maangka magütsüi voter million 2.1 bendenlokogo aser voter million 1.6 dak tema intokogo. Iba ken o ya süoki ia magira Delhi aser Lucknow nung onoki mener longkak aittsü, ta pai amokmerenogo.

Yadav-i, Election Commission of India (ECI)-i 2019 national elections ama masü political party tem nem list asadangsü atema magütsü, ta ashi. "ECI taoba mapang political party tem nem list asadangsü agütsüogo, süra kechiba tangbo magütsür?" ta pai osanbenertem den sensaksemba mapang ashi.

Yadav aser SP indang state tir Naresh Uttam Patel nati anir party lenirtemi Uttar Pradesh indang chief election officer den ajurutepa pa nem tezüluba nung takhangba ka agütsüogo. "Onoki Delhi (to ECI) nung tezüluba nung takhangba ka agütsüogo aser nungdak süra iba anema longkak aittsü," ta ashi. Paisa, ECI nung ketdangsurtem ya timba Uttar Pradesh nungi yokba lir, ta ashi.

Kasa mapang nung pai, Supreme Court-i Hombarnü

Lakhimpur Kheri azütokshi lendong nung bushisüngdang ya aija alisang pusema aoer ama reprangteter ta ashiba benoka jembi. "SP-i tetenzük nungi BJP-i sorkar kümteter ali tashibo Lakhimpur Kheri ken o nung ochi obendang angutsüji amatokang ta shia arudar. BJP indang triple engine sorkar yagi ochi obendang magütsüdaktsütsü. Triple engine- state nung BJP sorkar, Centre nung BJP sorkar aser Union minister Ajay Mishra Teni indang BJP sorkar, shiba tang tashi mapa nungi maneni lir," ta pai ashi.

Teni indang gari convoy kati aluyimba ozüng asem anema longkak aita aliba aluyimertem dak menünga sülen azütokshia lendong tulu ataloka liasü. Iba ken o nung minister Teni'er jabaso Ashish Mishra ya aija aritem rongnung ka lir.

Yadav-isa, iba ken o bushisüngdangba Special Investigation Team-i state sorkari parnok dang kechi inyakang ta shidir aji dang inyaksü, ta ashi. "2022 nung temelenshi ka arutsü aser ochi obendang agütsütsü," ta pai ashi.

Kasa anogo Yadav-i, Samajwadi Itra (perfume) sayaogo. Iba perfume bottle aser pongdang ya temerem aser tamak sentsü lir (SP sentsü) aser carton nung Yadav indang noksa keta lir.



Government Kamal Nehru hospital, Bhopal nung Paediatric Intensive Care Unit nung mi adokba sülen shiranger ka aninba noksa nung angur. Iba lendong nung kinü tanur pezü asü.

Activists & Opposition-i angati ration maneni agütsütsü akhanger

New Delhi, Yimpoksüi/ November 9 (Agencies): Right to Food Campaign aser opposition lenir kari Union sorkar dang Pradhan Mantri Garib Kalyan Anna Yojna (PMGKAY) kübok chiyongtsü angati agi agütsüba scheme ya atsülangtsütsü khangogo, koba November 30 nü tembangtsü lir.

"Right to Food Campaign-i, Pradhan Mantri Garib Kalyan Anna Yojana (2022 May ita tashi ita trok) ya tangsa tang atsülangtsütsü akhanger. Iba den bendenloksema ano totzü aser pulses tem kibongshi nem agütsütsü benokdaktsüner," ta parnoki food and public distribution minister Piyush Goyal dangi züluba shiti nung

shia lir. Right to Food Campaign ya kija aser lokti tentet balalai tentetba lir aser parnoki India nung right to food sentong ya atalokdaktsütsü bendanga agütsür inyakdar.

Parnokisa, nisung ajak nem (saru agütsürtem dak alaka) aser talisa, bendanger ayangertem, ki makarterem, sex workers, trans people aser tekübokba jenjang nung aliba nüburtem nem ration card medenia iba teyari ya agütsütsü khangogo. Network-isa, PDS nung totzü aser pulses amala temang nem teyari agütsüba chiyongtsütem bendenloktsütsü khangogo.

(Maneni tapak 9 nung...)



Jammu, Nov 9 : Mongolbarnü Jammu and Kashmir aser Ladakh High Court Chief, Justice Justice Pankaj Mithal-i achayanga obendanger tasen ana tenangzüktepa agiba noksa nung angur.



Glasgow, Scotland nung COP26 summit aliba mapang iba senden nung adener linük balala nungi lenirtem mesüka yanglur Clyde Canal nung tzü metsünga alidak tangokba noksa ka yangi angur. Glasgow nung UN climate summit hopta tanabuba senden amener, kong linük balala nungi lenirtem adenshia alima tzü-mopung tatsükba akumba nungi kumzüksü asoshi sentong aser nükla balala lemsateper.

Niger kitsük-kirong lendong nung kaketshir 26 asü

Maradi, Yimpoksüi/Nov. 09 (Agencies): Niger south tsütsü süng aser monü agi yangluba school takdang tem nung mi kaoloka arongba mapang school tanür 26 asü, ta iba tesem indang governor-i ashi. "Tang tasüba 26 aser yirur aliba nisung 13 lir, aser item rongnung par pezü kangasa mejungi yirur lir. Tanurtem ya arishi küm pungo aser trok tsüngta lir," ta Maradi yimti indang mayor Chaibou Aboubacar-i osangbener dang Hombarnü atalokba lendong indang ashi. Niger ya alima nung tesensaktiba linüktem rongnung ka lir, kong class takdang ama

amshitsü atema school ki ya süng aser monü agi yanglua lir aser mapang kakabo tanurtem ya ali nung amener. Mi kanga mela kaoloktsüba takdang nung iba ama lendong ya teti ajurur, saka nisung asü-amaba meliasü. Ajisiüka April ita Niamey district kübok school ka nung mi adoka kaketshir 20 asü. Niger Teachers' Union indang secretary-general, Issoufou Arzika-i osangbener dang ashiba agi, Hombarnü lendong nungya Maradi nung aliba school mitsü kuma rondok. Niamey nung lendong atalokba sülen monü aser süng

agi yangluba class takdang nung lendong lir ta union ajanga ketdangsür dang tekumdangtsü shir liasü, ta Arzika-i ashi. "Class ya monü agi yangluba ki dang nungi süngtongzüng nung agi tajungba, kechiaser monü aser asü agi yangluba takdang nungya tanurtem asoshi lendong tulu keta lir," ta pai ashi. Tawa ang Tir Mohamed Bazoum-i süng agi yanglua aliba school ki ya melentsütsü nangzüker liasü. Linük north tsütsü Dan-Issa district nung hon atoba tesem ka chirepa nisung 18 shi takum samar anogo ishika tsüngta school kidang kitsük-kirong lendong ya ataloker alitsü.


Belarus arütsü nung Poland-i migrant aika nokdanga lir

Warsaw, Yimpoksüi/Nov. 09 (Agencies): Anüdoklen kidanger linük, Belarus nungi migrant aser refugee noklang aika linüki aittsü merangba meinzüka yok aser ano nisung meyrirjang aika lemanng nung lir, ta Poland-i ashi. Anüdoklen arütsü nung iba tensa mechi sepai, arütsü anüker aser police talila yoksema lir, ta Warsaw-i ashi aser social media nung video kar prokshiba nung nisung kar arütsüleni arua liasü aser kari kotarang aser danga osettem amshia yinzü mesentepa yanglua aliba atsü rakpoksü meranga liasü. Iba ya ajanga ita aika timtema aruba tali akumer amai sayur. Mapang talangka nungi yimsü süa a rusang Tir Alexander Lukashenko indang sorkar nem anüolen linüktemi tenokdanga agütsüba asoshi mang ayanger ama Middle East aser Africa nungi migrant tem Belarus ajanga Poland, Lithuania aser Latvia linüktemi aittsü Minsk-i ajungshir, ta European Union-i tai tonglokja lir. Taoba küm August ita mangatetep aliba tir election nung kümsük trok buba atema takok anguba sülen Lukashenko-i Belarus nung sorkar anemer pua merenshi tenzük aser pai item taitzüba magizüker. Arütsü nung adenshia alirtemi Hombarnü arütsü nungboka aittsü merangba nokdangtetogo, ta Poland-i ashi. Poland ketdangsürtemi video ka prokshiba nung nisung kati

yinzü mesentepa aliba atsü rakpoksü meranga liasü, kati kotarang agi atsü raksatsütsü merang, aser Polish sepaitemi mejangjaba oset ka pongdang ka nungi khalokja liasü. "Arütsü rakpoka aittsü merangba interior ministry forces aser sepaitemi nokdangteta liasü," ta Poland defence ministry ajanga tweet ashi. "Migrant tem Kuznica region nung adenshia lir. Parnok ya Belarus sepaitemi maneni anüker." Aji masüdag Belarusian blogging service NEXTA ajanga video ka prokshiba nung nüburtem juli azüker aser asükwa süoshi agur highway tezülen jaja liasü. Ano video kar nungbo nisung telok tulu lenmanng nung mentepa liasü aser sepaitemi meiner ao. Poland arütsülen migrant nisung 3,000-4,000 shi liasü, ta Poland sorkar indang odongtar Piotr Muller-i osangbener dang ashi. "Iba ama mera ya Poland arütsülen ano agitsü imlar, aser yangji prangbong amshitsü akok," ta pai ashi. Migrant aser refugee aina Poland arütsüleni aor, ta Belarus state border committee ajanga Hombarnü ashi. Parnokisa, region nung sepai 12,000 dak tema yoka aliba Warsaw ajanga tim masüba mapa inyaker, ta ashi. Belarus nungi arütsü alema aittsü meranger timba akumtsü akok ta angateta arütsüleni sepai tali yoksemer, ta Lithuania-ia shiogo.

China-i Pakistan nem parnok indang warship tulutiba agütsü

Beijing, Yimpoksüi/Nov. 09 (Agencies): China-i parnok indang warship tulutiba aser ajak dang advance-ba Pakistan nem agütsüogo. Arabian Sea aser Indian Ocean nung Pakistan navy jenjang ajungkettsü merangba mapang tang iba rong agütsüogo. Iba rong ya China State Shipbuilding Corporation Limited (CSSC)-i design süa yangluba lir. Iba frigate ya Shanghai nung commissioning sentong ka ayongzüka agiba mapang Pakistan Navy nem agütsüogo, ta CSSC-i Hombarnü metetdaksü. Type 054A/P frigate dang ya PNS Tughril ta ajar ta state meyong Global Times sangdong ka ajanga Mongolbarnü metetdaksü. China dangi Pakistan ambassador Moin ul Haque-i, PNS Tughril commission asüba ajanga Indian Ocean nung tashi liromedema akümtsü, ta ashi. Tughril-class frigates ajanga Indian Ocean temeket nung tashi liromedema akümba den yimjung nung alitsü aser tzüyim nung defence ajungkettsü atema Pakistan Navy indang capabilities tajungba akümtsü, ta pai ashiba Global Times sangdong ajangsa metetdaksü. PNS Tughril ya Type 054 frigates pezü rongnung mezüngbuba lir, koba Pakistan



Navy atema yanglutsüogo. Iba rong ya technology tsütsü kanga advance aser surface-to-surface, surface-to-air aser underwater firepower atema sabang tajung ka aser iba den surveillance atemaa kanga tajangzük asütsü, ta Pakistan Navy-i ashi. Rong ya state-of-the-art combat management aser electronic warfare system ka den modern self-defence capabilities agi equip süa lir. Type 054A/P frigate yagi tensa majungba mapang khenyongi naval warfare missions aika inyaktetsü, ta kasa sangdong ajanga metetdaksü. Iba rong ya China-i tanga

linük nem agütsüba warship tem rongnung ajak dang advanced-ba lir, ta CSSC-i ashi. China aser Pakistan na tesendaktep kanga junga lir aser China ya Pakistan military atema prangbong hadir balala supply asür tulutiba lir. Navy atema rongtem dak alia, China-i JF-17 Thunder fighter aircraft yanglutsü atema Pakistan Air Force den longjemogo. India kishi; Indian Ocean nung China indang navy jenjang ajungketba mapang, tawa linük ana tsüngda military tsütsü tesendaktep dak tali rangloker inyakdar. Indian Ocean nung Horn of Africa kübok Djibouti nung

mezüngbuba military base amenokba dak alia China-i Arabian Sea nung Pakistan indang Gwadar port agiogo aser iba tesem ya China indang Xinjiang province den ali ajanga sendakteptsü, koba USD 60 billion China Pakistan Economic Corridor (CPEC) nung shilem ka lir. Kasa mapang nung China-i Sri Lanka indang Hambantota port küm 99 atema alizükba sülen iba port ajungket tenzükogo. Pakistan Navy modernize sütsüba den naval bases alizükba sülen Indian Ocean aser Arabian Sea nung China inyakyim tajungba akümtsü. China ket nungi modern naval frigates pezü alizükba dak alia Pakistan nem ano China nung yangluba submarine ti agütsütsü, ta Chief Admiral M Amjad Khan Niazi-i taküm February ita daily dang shia liasü. Type 054A/P frigates pezü yanglutsü atema Pakistan Navy aser China na 2017 küm tenangzüktepba yanglu. 054A/P frigate yangluba achayangba Pakistan Navy Mission tekolakba Commodore Rashid Mehmood Sheikh-i, PNS Tughril ya multi-mission capable frigate ka asünung iba ya Pakistan Navy fleet nung rong tongtipang ka akümtsü aser kasa mapang nung iba ajanga Pakistan Navy indang maritime defence capabilities tajungba kümdaktsütsü, ta ashi. PLA Naval Research Academy nung senior research fellow Zhang Junshe-i taoba mapang Global Times dang ashiba agi, Type 054A koba dak Type 054A/P amenoker yanglu, iba ya China indang rongtem rongnung ajak dang advance-ba lir. China nunger indang frigates tanga den medemdangra rong tasenba ya air defence capability tajungba, kechiyong iba rong nung radar system tajungba inokja lir aser longer range missile tem aika benteter, ta Zang-i ashiba den Type 054A frigate nung world-class stealth capability keta lir, ta ashi.

Tokhu Emong cum Mini Hornbill Festival tembangogo



Wokha, Yimpoksüi/November 09, 2021: Tokhu Emong cum Mini Hornbill festival shibangba sentong nung Horticulture & Border Affairs, Advisor Mhathung Yanthan-i telok den jembiba noksa nung angur.

Wokha, Yimpoksüi/November 09, 2021 (TYO): Deobarnü (07.11.2021) Local Ground, Wokha nung anogo asem tashi ayongba Tokhu Emong cum Mini Hornbill festival tembangogo. Iba benjungmung shibangba sentong nung Advisor for Horticulture and Border Affairs, Mhathung Yanthan alakteta tejaoker ama dena liasü, ta sangdong ajanga metetdaksü.

Iba sentong nung, Yanthan-i, Naga nung dak sobaliba tajung keta lir aser ibaji ajungkettsüsü atema Nagaland Sorkari Nagaland ya "Land Of Festival" ta sangoktsü, kong tanga kin benjungmung den külemi Mini Hornbill Festival agitsü asoshi Sorkar ajanga lemtet, ta ashi.

Yanthan-i, asen tetsü-tebo

Activists & Opposition-i... (Tapak 7 nungi...)

Food secretary Sudhanshu Pandey-i November 5 nü, coronavirus wara pokteter aliba mapang tekübokba jenjang nung alirtem atema free ration scheme amenokba ya November 30 sülenbo atsülangtsü kecha sentong mali ta ashiba sülen tang iba takhngba agütsüogo.

Pandey-isa Centre telemtetba dak sendakba nung, rongsenketzüng tajungba kümdar aser the Open Market Sale Scheme kübok shishilembadak chiyongtsütem ayokba ajanga ajangzüksü, ta ashi.

Congress' Rajya Sabha MP, Ripun Bora aser Trinamool Congress (TMC) MP Sougata Roy nung amala opposition lenirtemia iba scheme atsülangtsüsü mepeshia asüngdangogo. "PM dang PM Garib Kalyan Anna Yojana manendaktsüsü mepeshir, kechiyong iba ajanga sensaker kibong meyirejang aika nem teyari agütsür," ta Bora-i ashi.

Prime Minister Garib Kalyan Anna Yojana (PMKGAY) ya taoba küm March ita amenok aser April-June 2020 tashi benoktsü sentong liasü saka 2021 November 30 nü tashi atsülangtsü.

mapang nungi benshia aruba sobaliba tajung kümzüka ayutsü aser nüburtem tsüngda temeim aser tesendaktep tajung alitsü asoshi telok ayongzük.

Tarutsü tajungba asoshi pei taküm tanaben bendanga agütsüshir inyaksüla, ta pai ajungshia liasü aser asen tetsü-tebo temi sayuba sobaliba tajungtem teti benshitsü aser tangar dang tatishitsü tajung sayutsü asoshi mepishio.

Tokhu Emong ya Lotha kin indang benjung tulutiba lir aser aluruwa mapang temer sülen, tenüngsang agütsüsü, jungtephshiteptsü, lemsateptsü,

kati ka dang tai adoktsü aser medemer tsüngda tesendaktep tajungba yanglutsü asoshi iba benjung amunger. Tokhu Emong indang benjungmung tatembuba dang Loroe Tokhu ta ajar, koba kibong maküm alir tetsürtem atema ayongba benjung ka asütsü.

Iba sentong nung, Lotha Hoho, Vice Chairman, Mhonchumo Lotha menden liasü. Iba sentong agiba mapang, Rengma cultural troupe Tesophenyu Village aser N. Longidang cultural troupe nati sobaliba tsüngsang sayuogo, ta kasa sangdong nung shia lir.

Security Forces-i nisung pezü apu



O s a n g tejangka ka nung a j e m d a k e r, Security Forces den Police l o n g j e m e r general area - Mon Town mita aoba mapang, team-i nisung

Dimapur, Yimpoksüi/November 09, 2021 (TYO): Hokolbarnü (05.11.2021) Security Forces den Police longjemer Mon Town mita aoba mapang, nisung pezü den ozüng alema shibelenba yi pua liasü, ta sangdong ajanga metetdaksü.

pezü apuba den sen 60,000/-alang yi bottle 106 shi ngutet. Iba maparen dak sendakba nung maneni bushisüngdangtsü atema, pua alir den yi ajak Mon Police Station, Mon District nung agütsüogo, ta kasa sangdong nung shia lir.

LONGSA SENSO MORIA MISSION

Hon Jubilee Mung Sentong

Omen: "Sentsüwangshi Nüchi" 2 Kor. 3:17

Anogo : November 13-14, 2021

Onük Jembirtem

Wt. Mapula Missionary, IEF

Rev. Dr. Mar Pongen,
Executive Secretary, ABAM, Impur

Rev. Dr. Alemrenba Pastor, DABA

METETDAKTSÜR: Longsa Senso nübur aser anükapang ajak iba Hon Jubilee nung pelashishia jaoker.

T. SHILUCHIBA JAMIR Ex.G.B CHANGTONGYA TOWN 96TH BIRTHDAY ANNIVERSARY



Temeim kinüngbo, oba, obuo, oko.

Tanü na arishi küm 96 ajungba tepela anogo amungdang, ne mulung nung temeim aser tepela agi sünga alitsü ta onoki imlar. Küm 95 tsüngda ne dak atalokbatem nai kodang nüklai arudir, nai ajangshiba temenügratsü anogotemji bilemtetsü ta onoki amanger. Aser nai kodang tarutsü anogotem bilemdanger, ne mangdang aser nükla ajangzüktogeto ta nai pelaa bilema alitsü ta onoki imdangi arur. Tsüngremi arishi küm 96 tashi len anir aruba asoshi pa tenüng tali asanger, ano maneni arishi anogo tali moajang ta kinungertemi sarasademtsür.

Kinungtsü, Chirnurtem, Semchirtem, Anükabangtem, aser Kinungertem.

OFFICE OF THE WAMEKEN SENSO TELONGJEM TZUDIKONG TOWN TENÜNGSANG ASER TETUSHI AGÜTSÜR

Kongro MOASENLA, Wb. Lt. Yanger lmsong aser Wt. J. Anenla (Wameken) Jala, lai **Miss Mokochung 2021** tetoktepba nung takok korang nguteta konang nüngsang bener arutsü nung Wameken Senso Telongjem Tzudikong Town ajanga tenüngsang aser tetushi agütsür. La taküm aser tarutsü anogotem nung Tsüngremi maneni moaja len aniang ta ozü Senso-sanger sarasadem.



Sd/-
Bendangwati
President, WSTTT

Sd/-
Imtiwapang
Secretary, WSTTT

PELABA LEMSATEPER

Onoki teti meima aliba Obala, **M. Akangtemjen Ozukum** (Mongsenyimti) ajungbena iba akümüli toktsür oor onok mangyimba mapang kija-kibong, Arogo aser lokti shirnokisa nübo, rongsen aser sarasadem agi onok yariogo, nenok dang kinüngertemi pelaba lemsateper.

Talisa pa akümüli mapang nung kidang-kiyonger shirnoki mapang ajak nung pa den yaritepa aruogo, nenok dang alakteta pelaba lemsateper. Tsüngremi nenok ajak moajangma.

~ Temeim Chirnur,
Semchirtem aser
Kinüngertem.



ASO: 06/02/1936
ASÜ: 27/10/2021

OFFICE OF THE UNGMA SENSO TELONGJEM DIMAPUR : NAGALAND TENÜNGSANG AGÜTSÜR

Taoba Angh aser Chief Minister **Dr. S.C. Jamir**, shiba **November 08, 2021** nü **Padma Bushan** award agizüker Naga nung rongnung mezüngbuba aküm, pa nem Ungma Senso Telongjem Dimapur, (USTD)-i tenüngsang agütsür. Nübur tenzüka wadang nung pai alakteta shilem tulu agiba atema 2020 küm 71buba Republic Day sentong nung pa nem iba naroküm agüja liasü.

Iba award ya tangar dang nungi alakteta junga inyakba temaitsü lir aser lennir tajungi inyakba maparen nung maneni temulung lemteta aser tamang katetba atema, Ungma Senso Telongjem Dimapur-isa India Sorkar danga pelaba shisemer. Tarutsü nunga Naga nung asoshi lennir tain ka ama maneni shilem tajung agitsü asoshi Tulusang Tsüngremi pa nem anema aliba aser arishi talang moajangma ta sarasademtsür.

Sd/-
(TAKANUNGBA LONGKUMER)
President, USTD

Sd/-
(LIPOKMEREN LONGKUMER)
Gen. Secretary, USTD

Minister Tongpang-i 29buba Loyem Memorial Trophy lapoktsüogo



Tuensang, Yimpoksüi/November 09, 2021: 29buba Loyem Memorial Trophy asayamung indang mezüing match metenzükdang Minister for Housing & Mechanical, Tongpang Ozukum den Nyenshen FC aser Shanen FC asayartem külemi tangokba noksa ka yangi angur.

Tuensang, Yimpoksüi/November 09, 2021 (TYO): Mongolbarnü, Minister for Housing & Mechanical, Tongpang Ozukum-i, 29buba Loyem Memorial Trophy asayamung lapoktsüogo. Iba asayamung lapokba sentong nung, Minister Tongpang alakteta tejaoker ama dena liasü, ta sangdong ajanga metetdaksü.

Alima ajunga asüingba coronavirus wara ajanga maparen/sentong ajunga thitema arur sülen tang iba tensa tera süngjema akümba mapang ka, "No to depression, Yes to football" omen nung ajemdaker iba asayamung ayongzükba atema, Minister Tongpang-i CCSU dang pelaba metetdaksü.

Loyem Memorial Trophy,

koba state nung football asayamung rongnung mezüing asütsü ama asadangteter, iba asayamung nung shilem agitsü maangka anguba atema pai telok dang pelaba lemsatop aser State nung sempet tajung alir asayartem nem sabang agütsüsüsa maneni meranga inyaksü asoshi pai CCSU ajungshia liasü.

Lanurtem ajungshiba mapang, Tongpang-i, maparen aika nung teka amoka inyak dang nungibo, maparen ka nung takotet ka ka akümtsü asoshi mangdang yur inyaksüla ta ayongzük.

Tongpang-isa, iba asayamung nung shilem agirtem dang ajemalua aser bendanga agütsür inyaksü aser iba den külemi Loyem Trophy mesüra tanga asayamung dang nungi

temaba jenjang nung shilem agitsü aser State nem tenüing tajung bener arutsütsü asoshi ajungshiogo.

"Asenoki football asaya akhümtsübutüla aser Naga nung tsüingda football saisapong ya sobaliba ka ama kümtsütsüla; aser kenü anogobo India nung Nagaland ya football asayar tajung adokba state ka kümdaksütsü asoshi meranga inyaksüla," ta pai ashi.

Maneni, Nagaland nung Astro Turf football ground tanabuba yanglutsü asoshi Tuensang District shimba atema, Minister Tongpang-isa Youth Resources and Sports Department dang pelaba shisem.

Tuensang nung Astro Turf football ground ya sangküm tashi nungbo renemtsü, pai ashi.

39buba Nagaland Police Duty cum Sports Meet ayongzüktsü

Dimapur, Yimpoksüi/November 09, 2021 (TYO): 75buba Azadi Ka Amrit Mahotsav nüngtem nung, Nagaland Police Family Welfare Association aser Police Officers indang kinungtsütem den tanga rank (Police) nung alir ajak longjemer 'Family welfare competition 2021' ayongzüktsü, ta sangdong ajanga metetdaksü.

Iba asayamung ya November 12, 2021 nü anepdang 11:00 ako meta

NAPTC Hockey Ground Chumoukedima, Dimapur nung tenzüktsü aser CM Rio kinungtsü, Kaisa Rio-i iba asayamung lapoktsütsü.

Kasa anogo, nikongdang 2:00 ako meta NAPTC Hockey Ground Chumoukedima, Dimapur nung Chief Minister, Neiphiu Rio-i 39buba Nagaland Police Duty-cum-Sports Meet 2021 lapoktsütsü. Iba sentong nung tetushi tesemdanger ama President, Indian Olympic Association aser President,

International Hockey Federation, Dr. Narinder Dhruv Batra jaoka lir.

Maneni, November 18, 2021 nü 39buba Nagaland Police Duty-cum-Sports Meet 2021 shibangba sentong nung Deputy Chief Minister & Home Minister, Y Patton alakteta tejaoker ama aruagi adentsü. NAPTC Hockey Ground Chumoukedima, Dimapur nung nikongdang 2:30 ako meta iba asayamung shibangba sentong agitsü, ta kasa sangdong nung shia lir.

Aston Villa-i manager Dean Smith mapa nungi anentsü

Yimpoksüi/November 9, 2021 (Yimpoksüi): Asaya pongu tashi atonga makokba sülen Aston Villa-i coach Dean Smith mapa nungi anentsüogo.

Premier League club yagi iba osang ya Deobarnü sangdonga liasü. Smith, lenisüba nung iba club top flight-i ajungketa liasü, ajisüaka team-i junga masayaba sülen pa mapa nungi anentsüogo.

Hokolbarnü Southampton goal 1-0 agi makokba sülen Smith tia tejangja aküm. Villa-i asaya 11 nung point 10 dang nguteta lir aser relegation zone-i point ana agi dang mei lir.

Villa chief executive Christian Purslow-i club indang website nung, "taküm result, performances aser league position nung temelenshi kecha mangur, koba onoki imlaa aruogo.



"Ibayongji onoki temelenshi bener arua new head coach tasen ka nem team anidaksütsü telemtetba agiogo," ta ashi.

Taoba mapang Brentford manager Smith-i 2018 küm October ita iba coach mapa agizük.

Pai club achaayang tenzükba

sülen mezüingbuba season nung play-off ajanga team Premier League-i aniket aser relegate mesüi asayadaksü aser küm ka lir Carabao Cup final tonga club ani.

Parnok taoba season jenjang 11buba nung tembang, saka parnok rongnungi nüngtugu asayar Jack Grealish summer nung Manchester City-i oatokba ajanga parnok jenjang mejungi aküm.

Purslow-isa, "board-i takoktem ajak asoshi Dean dang kanga pelar," ta ashi.

"Dean aser par kibong asoshi Aston Villa ya koda tongtibang aji ajaki meteta lir. Pai club kanga meraketa tenzükogo aser pa staff, asayar aser club pusemertem amala Aston Villa dak sendaka alirtem ajaki sakloka aser akhümtsübuta liasü," ta Purslow-i ashi.

'Catch Them Young' asayamung asayatsü

Kohima, Yimpoksüi/November 09, 2021 (TYO): Department of Youth Resources & Sports-i tetsür aser tebur atema Badminton, Table Tennis aser Athletics nung 13buba U-14 Inter-District Catch Them Young Tournament ayongzüktsü terenemba lir. Iba asayamung ya November 10 nungi November 12, 2021 tashi Indira Gandhi Stadium, Kohima nung ayongzüktsü, ta sangdong ajanga metetdaksü.

Iba asayamung temer sülen, asayar tajungtemi tejangraba lira, Sports Academy nung anioktsü asoshi item asayartem jangjatetsü.

Catch Them Young indang mezüing session ya November 11, 2021 anepdang 10:00 meta IG Stadium, Kohima nung

agitsü. Iba asayamung lapokba sentong nung, alakteta tejaoker ama Advisor to Chief Minister, Abu Metha aruagi adentsü.

Iba sentong nung menden, Director, YRS, Akumla Chuba-i telok pela agizükba o jembitsü. Edikunu Rikha aser medemertemi ken ka atentsü aser alakteta jaoker Metha-i o jembitsü. Tenangzüktep agitsü atema (oath taking), tayonger team captain-i asayatem tenüing nungi shilem agitsü, kasa mapang ketdangsür tenüing nungi T Imtisungit Ao-i tenangzüktep sentong ketdang asütsü.

Iba sülen, Metha-i iba asayamung lapoktsütsü aser asayamung tenzükba teburtem '100m heats' asayatsü, ta kasa sangdong nung shia lir.

Sanjay Bangar-i RCB indang head coach inyaksü

New Delhi, Yimpoksüi/November 09, 2021 (Agencies): Mongolbarnü, Royal Challengers Bangalore-i, Sanjay Bangar-i taruba küm ana atema Tuesday announced that Sanjay Bangar Indian Premier League franchise indang head coach ama inyaksü ta sangdongogo.

Bangar-i taoba mapang Australia opener Simon Katich melena RCB indang head coach ama inyaksü.

Sanjay Bangar, shibai Ravi Shastri den India Team indang batting coach ama inyakogo, IPL 2021 season mapang pai RCB indang batting consultant ama inyaka liasü. Ano külen, Mike Hesson-i Director of Cricket ama maneni inyaksü. Timtem kar ajanga Katich-i IPL 2021 tanabuba nungi tukadokba sülen, taoba mapang New Zealand coach Mike-i head coach mapa repsema inyak.

IPL 2021 nung play-offs tashi shilem agiba sülen, Virat Kohli-i captain ama RCB toktsü aser taruba season nungi RCB pur asalentong melenshir asayatsü terenemba lir.

India team indang star batter, Kohli-i ashiba agi, RCB atema maneni asayatsü. Taruba season atema auction magidang, Bangar-i Mike Hesson den külemi inyaksü.

"Auction asalentong dak sendakba nung onoki maparen inyak tenzükogo. Squad tajung ka yanglutsü asoshi onoki bendanga agütsür inyaksü ta RCB fans danga metetdaksüner aser mapang talangka nungi IPL trophy takok angutsü mangdang ataloktsü asoshi onoki meranga inyaksü mulunga lir," ta Bangar-i ashi.

"Iba ama franchise tuluka nung Head Coach inyaksü aniokba ya maangka aser konang ama agizüker. Iba squad nung sempet tajung alir asayar kar den külemi inyakdangogo aser parnok nem temaba jenjang ajangzükdaksütsü atema yongyaseter," ta pai ashi.

"IPL Mega Auctions aser taruba season atema nüngdakba maparentem jenti anüingdaka lir, saka management aser support staff den maneni longjemer onoki tajung inyaktetsü aser alima tesem ajunga nung fans tem peladaksütsü asoshi maangka angutsü imlar," ta Bangar-i shisem.

Mike Hesson-i Bangar nem tenüingsang agütsü aser pai ashiba agi, mapang talangka asadangshir sülen ang taoba mapang India batting coach Bangar shima liasü, ta pai ashi.

"RCB-i team tsüingda asayar tajung adokdaksütsü aser parnok nungitta yaritsü nükla yur inyaker aser Sanjay Bangar shimba ya team tebilemba ataloktsü asoshi inyaker. Sanjay Bangar-i batting consultant ama support staff den külemi yaritepogo aser pa dak asayar aser batting coach ama tajangshiba jenti. Mapang talangka atema pai Indian cricket team den inyakogo," ta Mike-i ashi.

"Selection inyakyimtem junga asadangshiba sülen, head coach atema Sanjay shima liasü. Pai ajangshibatam sayutsü aser squad tajungba yanglutsü asoshi pai inyaksü imlar. Head coach mapa nung aniokba atema Sanjay nem tenüingsang agütsür aser team tejakleni bener aotsü asoshi pai tajungtiba nung inyakatsü imla atar," ta Mike-i shisem.

BILEMDANGANG

"Tamashi takari tenüingsang ola arulen pa tejak meyiper."